

**Veurselektie Liedjesavond**  
**2024-2025**



**9 september 2024**  
**'t Raodhoes in Bliërick**



**1. Druim met mich de vastelaovend**  
**Linda Smeets en Marcel Driessen**

Vers:

Ik zeen dien auge kiéke  
Vol leefde, zonder spiét  
Nao dees dreej daag zal bliéke  
Raak ik dich toch weer kwiét

Refrain:

Druim met mich de vastelaovend  
Dans met mich wies det 't is gedaon  
Laef met mich wies dinsdaagaovend  
Bliéf nog efkes beej mich staon  
Hald mich werm  
Zoë in dien erm  
Dan vergaet ik veur efkes  
Vergaet ik hiél efkes  
Det ik dich mótt laote gaon

Vers:

Ik zeen dien auge blinke  
Weit det ik dich al mis  
Had ik oeits kinne dinke  
Dit neet veur iëuwig is

Brök:

Toch dreijt mien ganse jaor  
alle daag en idder oor  
um mien leefde veur dich



## 2. Miene roze bril

Stan Dekkers

### Koeplet:

Ik woel ein kerke bouwe.  
Dus ging met planke sjouwe.  
Op groëte naegel houwe.  
Tot ik d'r naeve sloog.  
En weg waas al mien power.  
Mien mörfke trok steeds grauwer.  
Mien hand die wordt maar blauwer.  
Ik wis neet waat ik zoog.

### Refrain:

Maar miene roze bril.  
Dae mak noow ut verschil.  
Luuét weer ut moeïe zeen.  
Det waat verdween.  
Want mit ein glaeske op.  
Kump joeks truuik in de kop.  
Ik kin weer gans spontaan,  
de waereld aan.

Schuúf-träöt die woel ik speule.  
Mich entertainer veule.  
't Waas waal efkes beule.  
Ik kreeg geluud d'r oét.  
Maar door neet op te lette.  
Verkierde pas te zette.  
Deej ik mien tendjes plette.  
Ik waas snel oétgetoét.

Ik ging mei op de lappe.  
Waat gaele rakkers happe.  
Det ware ein stel rappe.  
Die dronke aan ein stök.

Mien praote woort dus lalle.  
Ik leek waal eine malle.  
Ut woort ech carnavalle.  
Ik veel naeve mien krök.

Ind: Door miene roze bril, bin ik zoe chil.



### **3. Thoes**

**Roy van den Broek**

Intro:

't Laeve det zuk ziene waeg  
Unne lach, en 'n traon , mei ouk kraeg  
Wao weej ouk gaon , jao dien hert is mien hoes  
As ik maar beej dich bin dan is euveral mien thoes

Refrain:

Heej is mien thoes, heb ik mien hert verlaore  
Heej steit mien hoes en bin ik groeët gewaore  
Heej belaef ik golde jaore  
Groeët gelok guuef altied gooje zin  
En noow bis dich miene waore  
Wao mei ik dit heej noow belaeve kin  
Gaon noeëts mier weg kin ik gerös verklaore  
Ik plok d'n daag en veul mich thoes dao wao ik bin

Couplet:

Hiel wat van de waereld heb ik al gezeen  
Alles wao ik altied van gedruimp had  
Dinger gaon ontdekke , alles wille zeen  
Veul mich de keuning dan te riek in iddere stad  
Wao ik gaon of staon mien hert is toch beej dich  
Ouk met de ouge toe bis dich beej mich

't Is wie vastelaovend same onderein  
Lekker met zien alle oet de plaat gaon  
Kin ik dan neet mei gaon veul ik mich allein  
't Is veur mien geveul dan ouk nog neet gedaon  
Ik staon gans allein te danse op de steul  
Det guuef mich dan det waore thoesgeveul



#### 4. D'n Blinde

Teun Paulussen en Steve Sprengler

1.

Mien maedje is ein kwant, hiel vlot en auk charmant.  
Ein lekker stel zien weej,  
Maar gaon ik met die snoët met vastelaovend oët,  
Nao aevel welk kefee,  
Dan wet die vlotte meid,  
Mich altiëd te verrasse, staon ik nog beej de jasse,  
Is het um al gepleit

Refr.:

Heej zeen ik euveral bekinde,  
Maar ik zeen dich nimmer staon,  
Och, leve schat, ik heb nog ore zat,  
Veurdet we weer nao hoës toe gaon,  
Ik wil dich lever nog neet vinden,  
En auk dich speuls gaer d'n blinde,  
Daen eine kiër, allein wanniër 't vastelaovend is,  
Vlindere weej gaer,  
Nao det geträöt, gealdetäöt, as 't al aovend is,  
Vinde weej ôs weer.

2.

Al zien weej gans d'n tiëd ôs groëte leefde kwiët.  
Veur noow is det okee.  
Want ja, ik staon hiel gaer beej die van Bliërick Veer,  
En dich beej Dames Dreej.  
Al bis dich oët 't zich,  
Dan bisse, hertedeefke, gaef ik dich op ein brefke:  
Toch gans wég van mich!

Refr.

Refr.

En gaer!



## 5. Wae geit d'r mei?

Annette Hermans, Lonneke van Doorn, Marcel Schuurmans en Ruud Geeraets

### Vers:

Vindt geej't now neet te gek?  
Weej wille toch zoë gaer,  
Maar nôrges is d'r plek.  
Wao môtte weej dan haer?  
Maar eine zag: "Huur heej,  
Ik krieg inens ein good idee"

### Refrain:

Wae geit d'r mei, nao, wao weej dôkker haer gaon?  
Dao is allich, veur, ôs ein plaetske vreej.  
Zoë neet dan môt geej ein klein bietje douwe,  
dan kinne weej d'r met gemaak nog waal beej.

### Vers:

D'n aovend vloog veurbeej,  
't Waas te gauw gedaon.  
Weej bleve lever heej,  
dan al nao hoés te gaon.  
Al wuurt 't nog zoë laat  
maar thoés dan velse in ein gaat

### Refrain:

Wae geit d'r mei, nao, wao weej dôkker haer gaon?  
Dao is allich, veur, ôs ein plaetske vreej.  
Zoë neet dan môt geej ein klein bietje douwe,  
dan kinne weej d'r met gemaak nog waal beej.

### Brug:

Toch hebbe weej genôte, en gluif ôs now maar gaer  
die plek dao gaon we dôkker haer, jao dôkker haer.....

### Refrain:

Wae geit d'r mei, nao, wao weej dôkker haer gaon?  
Dao is allich, veur, ôs ein plaetske vreej.  
Zoë neet dan môt geej ein klein bietje douwe,  
dan kinne weej d'r met gemaak nog waal beej.



## 6. Druim van mien verlange

Evelien Merkx

Refrain :

Ik bin det zunke op dien wange  
Vastelaovend det bis dich  
Dich bis de druim van mien verlange  
Groeët gelök det guuefs dich mich  
Dich kleurs mien hert en luuets 't bleuje  
Wies det 't fonkelt en geit greuje  
Laot ze lekker praoete al die minse  
Neemes kin zich van zien laeve nog mier winse  
Vastelaovend dich veur mich en zeker ik veur dich  
Steit geschraeve in de lach van dien gezich

Couplet:

Vreuger waas ik einzaam  
Druimde toch al euver dich  
Had nooëts kinne weite det d'r eemes zoel zien veur mich  
Noow weit ik waal baeter en schrief ik 't op iddere roet  
Sprookjes waere waor en kómme oet

Noow zeen weej wat alder  
Maar nog altied gek opein  
Dae druim van golde jaore geit maar door weej blieve beejein  
Ein dink weit ik zaeker dich bliefs toch ech de waore veur mich  
Wat in de sterre steit schreef ik veur dich



## **7. Kôm dich ens efkes heej**

**Sandy van de Perre en Lony Wouters**

**Koeplet:**

In polonaise laup ik door de zaal  
Inens zeen ik dao ech wat moeis bewaege  
Ik dach metein, dae kwante gaajt mich waal  
Dae kom ik morregevruug nog hiel gaer taege  
Ut is veur mich ein oetgemakde zaak  
Dae Cupido dae schuut vandaag heej raak (auwieje!)

**Refrein:**

Kom dich ens efkes heej, zeg mich bis dich nog vreej?  
Dich bis ut hielemaol veur mich  
As ik ein ougske kniep, waer ik geheid dien tiep  
Jao det sprik toch gans veur zich  
Kieks dich zoë wie gezag, nao miene golde lach  
dan wuurt dien hert vas auk ut mien  
Noow kom en knoevel mich, dan garandeer ik dich  
Roëzegeur en maoneschien

**Koeplet:**

Ik zeen des dich wat doënderbeej kums staon  
Dus det begint d'r ech al op te lieke  
'k Zal auk ein stökske diene kant oet gaon  
dan zalse veur mien sjarmes gaon bezwieke  
Ut is veur mich ein oetgemakde zaak  
dae Cupido dae schuut vandaag heej raak (auwieje!)

**Brök:**

Zeen ik dich heej naeve mich dan staon (Aohh!)  
dan haet dae piel en baog zien werk gedaon (Oelala)  
Dae Cupido dae had hiel good gerich  
al kreeg hae wal ein bietje hölp van mich!



## 8. Kiek heej

Kevin Timmermans

### Intro:

Ut pekske det leejt klaor ,  
wae geit noow met mich meij?  
We gaon d'r waer taege aan!

### Couplet:

Mak mich gaar nik s oet wao det weej joetse gaon,  
ut boeit mich neet met wae of wie en wao.  
As d'r maar meziek is en töffe minse zien.  
Dus kôm noow mei of anders kumpse nao.

### Refrein:

Kiek heej die minse staon,  
genne tied um nao hoes te gaon.  
Ut laeve wuurd gevierz,  
wie ik det van mam en pap heb gelierz.  
Kiek heej die minse gaon  
smeis met eine lach, sôms met ein traon.  
Dus geneet maar en maak plezeer,  
dezen daag is d'r veur ôs.  
Laef ut laeve heej en noow,  
de vastelaovend is begôs.

### Couplet:

In dae bônte toemel, kiek die kleure ens,  
ik staon d'r middenin en gaef um gaas.  
Heej veul ik mich thoes en haet mien weeg gestaon,  
ut is heej good wie 't is en wie 't waas.

### Refrein: (2x)

Laef ut laeve heej en noow,  
de vastelaovend is begôs.



## **9. Vastelaoveshudje**

**Sandra Schattenkerk, Marion Nissen, Marc Houwen en Leon Theuws**

**Vers:**

Bisse gries of bisse kaal,  
bisse diek of super smaal  
haese vuul of weinig geld,  
'nnen gek dae dao veur velt.  
Zeuk gewoën op dien meneer, dich ein hudje det dich pas,  
met zaon hudje veulse dan geliék, weer de joeks van de pias.

**Refrain:**

Weej zette ôs ein hudje op,  
zoë maar veur de jen,  
Zaon hudje net wie det van ôs,  
nae det köpse nörjes gen.  
Weej zette ôs ein hudje op, en as dich d'r auk ein haes,  
dan lopse lekker mei met ôs, in de groëte polonais....2x

**Vers:**

Bisse groët of klein van stök,  
bisse ein of twiëde plök,  
geise gans op dien meneer,  
poepie sjiek of ordinair.  
Laot dich dan ens lekker gaon, met zô'n hudje is det kwant,  
maar och asse neet zô'n hudje haes , maak d'r ein van 'nnekran.

**Brök:**

Zoë viére weej 't laeve, det is toch neet beklop,  
weej zette met ôs hudjes, de tent heej op de kop.....

**Refrain gemoduleerd**



## 10. Kôm in mien erm

Stan Dekkers

Minsekinder wat ein moeie snoët,  
ik kin d'r gans d'n aovend al neet euver oët.  
Zoog um ônverwach,  
met dae moeje, leeve lach.  
Noow dink ik had ik maar gezag.

Kôm in mien erm dan hald ik van dich.  
Kôm doënderbeej en kös dan met mich.  
Kôm beej mich staon,  
ônder de maon,  
en laot d'n druim nog ef bestaon.  
As ik dan morge wakker waer.  
Weer aan dich dink dan dink ik gaer,  
aan diene lach, aan dien gezich.  
Det is 't, miër weit ik neet van dich.

Dus bin ik um achternao gegaon  
en heb auk hiel dich beej um in de buurt gestaon.  
Dao toen zoë gezag,  
al mien kanse euverdach.  
Toch dink ik had ik maar gezag.

In gedachte bin ik einen held  
en in gedachte staon ik dök van mich versteld.  
Wie ik um versiër.  
In gedachte lök mich miër.  
Ik zeg um kiër op kiër op kiër.



## **11. Bliërickse samba**

**Patricia Görtjes, Sharon Meelkop-Suiker, Marianne Knorr- Jansen, Marion Pleunis en Renee Wilders**

### Vers:

Küüb dach ens wetse waat,  
heej is t mich te naat.  
Ik gaon noow nao 't zuuje,  
fiës ik door wies s'aoves laat. [OB]  
Merieke zoog um staon  
en zei: "met dich wil ik wal gaon", [OB]  
dan dans ik de Samba met dich.

### Refrain:

Weej danse de Samba in de maot  
Lekker in de kloësterstraot  
Samba danse, fijn bewaege  
Hald de zörg maar achterwaege  
Laot die häöpe noow maar dreije  
Moëie kledjes lekker zweijke  
Zelfs dae gekke pallesaot  
Held de vutjes in de maot  
Dans met ôs mei dan gaon we door, [OB]  
wies aan 't allerletste oor  
Dansend gaon we door 't laeve  
Jao det is os wal gegaeve

### Vers:

Jao in dit bliëricks riek, [OB]  
Gaon sjanse op meziëk  
Ze slaon de sambaballe,  
Man waat hadde zeej publiek  
Betauverd ware zeej ,  
door dae meziëk, wasriëf d'r beej,  
zeej danse de Samba veur ôg.

### Brok:

Samba heej , Samba dao  
Dans met mich mei in de nach  
Samba heej ,Samba dao  
Det haet ôs leefde gebrach.



## 12. 't Viefde jaorgetjej

Evelyn Theunissen, Arno Arts en Hans Aerts

Linte kump en linte geit,  
de zomer haet zien ind.  
En herfs de's net dae deurt wies det,  
d'n elfde van d'n elfde weer begint.

As vastelaovend weer veult wie nie,  
dan begint veur mich 't viefde jaorgetjej.  
De ganse winter haet pech,  
dae dink ik wies Aswoensdaag weg.  
'Tis wal ef winne, as weej ôs zinne,  
weer op die dreej daag zette kinne.  
Maar dan veurspel ik ôg wal,  
det idd're zitting idder bal,  
weer ein fiësje waere zal!  
(vastelaovend waere zal!)

'Tis neet det ik al dae'n tiéd,  
neet aan dae viefde dink.  
Maar zeker as 't is zoë wiéd  
en ik dan weer de liedjes huur en zing.

Noow ik lang zat heb gewach,  
de winter ruúke kin.  
D'n tiéd weer riép is zoë gezag,  
dan knalle weej de vastelaovend in!



### **13. Laup ôs noow maar nao**

**Marina Claessen en Willy Billekens**

1.

Op dees waereld is bes van alles mis:  
Euveral leweit,  
Det deurt, bin ik bang, noow al net zoë lang,  
As de aerd zich dreit,  
Dan dinkse altiëd weer ,  
Och minseleef, wao môt det haer.

Refrain:

Laup ôs noow maar nao,  
Jao, weej weite de waeg veur dich,  
Want met geschmink gezich,  
Dan kumpse wies ik weit neet wao,  
Laup ôs noow maar nao,  
Wies daen toemel is oëtgevaeg,  
Det köpke laeg, dan zien we dao!

2.

Mooder werk zich dök haos ein ôngelök,  
Duit zoë good eur bes,  
Idd'ren daag zes oor, môt det aete klaor,  
Kaok dan van de stress.  
Al duit det ôg auk pien  
Laot det fornuus noow toch ens zien:

Refrain

3.

Zusse heej vandaag, emus oët Den Haag,  
Neem um beej de hand,  
Asse dich versteit, zeg um wie det geit  
In ôs Bliëricks land  
Dan lök 't dich meschien.  
En kump dae auk wao hae môt zien:

Refrain

Dus laup ôs noow maar nao.



#### 14. 't gelök

Joyce Verkooyen-Hanssen, José Thijssen-Linders en Debbie Kunz-Suiker

D'r wuurt waal gezag "scherve bringe dich gelök"  
Noow velt mich zoevuel oet de hand, ik weit det det waal lök  
Ouk wuurt verteld det 't met de dómme is  
Mier gelök dan wiesheid, dao met is toch gaar nik s mis

k' Weit det gebeurt mich dök  
Dan houwt 't gelök mich van de zök  
En det deil ik gaer met dich  
Det is d'r neet allein veur mich  
Weit wie klein gelök kin zien  
Neet in volle zek maar meistal fien  
Löps d'r mekkelik aan veurbeej  
Maar kiek ens aan noow is 't heej  
Raap 't maar op  
T'is veur nop  
Raap 't maar op.

Ik vind 't neet erg as ik pech heb in ein spel  
Gelökkig in de leefde det is wao ik mier op tel  
Geld heb ik neet, altied bin ik dan ouk keps  
Veur gelök mak 't nik s oet asse gaar gen schrabbers hebs

Waat ein gelök, ik heb dich heej aan mien zie  
Met iddere vastelaovesdaag veul ik det weer opnie  
Bis dich beej mich kin ik mien gelök neet op  
Want weej zette met die daag heej alles op de kop



## 15. Ôs iérste leefde

Bram Bongers en Amber Coolen

Vers:

Dae vastelaoveszôndaag, vergaet ik noëts neet miër  
Waat einen daag!!!  
Ik zoog toen in de vaerte, dich veur d'n iérste kiër  
en raakte gans van slaag.  
det waas veur allebei gans niej  
maar we ware oh zoë bliej

Refrain:

Ôs iérste leefde, is toen ôntstaon  
en is veur ieuwig bliéve bestaon.  
Nog altiéd vlege, de vlinders door ôs liéf  
dit, kin toch allein, maar waore leefde zien.

Vers:

Dae vastelaoveszôndaag, dae blief veur ôs spesjaal  
Waat einen daag!!!  
Dae bliéve weej gedinke, en viere det rejaal,  
weej vinde det det maag.  
jao, det doon weej eder jaor  
en dao gaon we auk mei door.

Refrain:

Ôs iérste leefde etc.

Brôk:

En euver hônderd jaor, hald det waal ônder ôs.  
Dan viere weej nog steeds, wie 't oëts is begôs

Refrain:

Gemoduleerd (laatste regel herhalen)



## **16. Bin ik te laat?**

**Geordi Gijsen en Anne Reehuis**

### Vers 1:

D'n optoch kin noow elk moment gaon trekke  
En ik staon tiédig klaor  
Dus kriég ik weer de schöld as d'r ein gaan velt  
Dan is det gaar neet waor  
Ondanks al mien gooij' intenties  
Ouk al laup ik zoë good door

### Refrain:

Bin ik noow te vruég of bin ik te laat  
Want d'r velt heej weer ein gaan  
En as d'n optoch weer ens efkes stil steit  
Dan geluif maar det ik weit  
Det gaan det leet aan dich of aan dae achter mich  
Want ik doon altiéd good mien bes  
Zoë lierde ik al snel de wiéze les  
't leet ech altiéd aan de res

### Vers 2:

Die andere staon maar te klasjenere  
En lette gaar neet op  
Want steit d'r ein bekinde aan de ziékant  
Dan wuurt d'r weer gestop  
Nae zoë kómme weej neet wiejer  
Kriég ik weer op miene kop

### Brök:

Zaet eemus taege mich  
Die gater mótté dich  
Sloét ik mich dao beej aan

